

# INUIT ATAQATIGIIT

## Inatsisartuni



28. august 2018

Inatsisartut Suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara.

- 1) **Naalakkersuisut Kalaallit Nunaata Inuit Pisinnaatitaaffii pillugit Siunnersuisoqatigiivi pillugit inatsisissatut siunnersuummik nutaamik saqqummiussiniarpasipput. Inatsisissatut siunnersuut saqqummiunniagaq Inatsisartunut qinersineq sioqqullugu tusarniutigineqartumik qanoq allaanerusuteqarpa?**
- 2) **Naalakkersuisut nutaamik inatsisiliornikkut siunnersuisoqatigiit Naalakkersuisunut attuumassuteqartutut inissisimajunnaartikkumallugit immikkut allattoqarfittaarnissaat qulakkeerumavaat?**
  - a. **Tassunga atatillugu Naalakkersuisut Inuit Pisinnaatitaaffii pillugit Siunnersuisoqatigiinnut ilaasortat toqqarneqartarnerannut periutsimik ullumikkornit allaanerusumik qulakkeerinnikkumappat taamaalilluni attuumassuteqannginnissaq isumannaarumallugu?**
- 3) **Inuit Pisinnaatitaaffii pillugit Siunnersuisoqatigiit immikkut allattoqarfittaarunik aningaasalersorneqarnerat pillugu Naalakkersuisut arlaannik isumaliuuteqarpat?**
- 4) **Inuit Pisinnaatitaaffii pillugit Siunnersuisoqatigiit ullumikkornit suliaqarnerunissaannut aqputissiussinissamat Naalakkersuisut qanoq isumaliuutersuuteqarpat?**

(Inatsisartuni ilaasortaq Sara Olsvig, Inuit Ataqatigiit)

### **Tunngavilersuut:**

Kalaallit Nunaata Inuit Pisinnaatitaaffii pillugit Siunnersuisoqatigiit 2013-mili piupput marloriarlutillu nalilersorneqarsimallutik, nalilersuinerit aappaa attuumassuteqanngitsunit suliarineqarpoq aappaalu nammineq suliaasumik nalilersuinerulluni. Nalilersuinerit takutippaat siunnersuisoqatigiit namminneq allattoqarfeqartariaqartut suliaqarnerusinnaasullu. Nalilersuinerit aamma takutippaat siunnersuisoqatigiit Naalakkersuisunut attuumassuteqannginnissaat erseqqissarneqartariaqartoq, aammattaaq Naalagaaffiit Peqatigiit inuit pisinnaatitaaffii pillugit paasinaasarfiit pillugit Parisimi tunngavissaliussaas malinneruneqassappata annertunerusumik attuumassuteqannginnissaq pingaaruteqartoq. Siunnersuisoqatigiinnut suliakkiissutit erseqqinnerulernissaanik aamma inassuteqaateqartoqarpoq taamaaliornikkut sinaakkutissat erseqqinnerusut isumannaarneqassammata..

Taamaammat taaneqartut tunngavigalugit Inuit Pisinnaatitaaffii pillugit Siunnersuisoqatigiinnut nutaamik inatsisissamik siunnersuusiornissaq pisariaqarpoq. Qinigaaffiup siuliata naajartornerani

inatsisissatut siunnersuutissamik tusarniaasoqarpoq naatsorsuutigineqartariaqarporlu suliamik  
piareersaareertoqarsimassasoq tusarniaanermilu akissutit tunngavigineqarsimassasut.

Ullut suliffiusut qulit qaangiutsinnagit akisoqarsimanissaa naatsorsuutigaara.